

Adschee, schee Welt!

Wenn merr su in dene Daache wie jetz sesommesitze dut, kimmt merr beim Babbele um dess, was grad in de Welt su vor sich gieht, nitt drummerum.

Su aach omm Sunndaach omm Stommdisch. Doo seet de Karl: Was doo jetz in Paris bassierd iss, dess iss doch gons schlimm, odder? Doo renne su e paar Kerle in e Büro enoi odder innen Supermarkt, schieße oofach druff los unn bringe unschuldische Menschen um.

Ja, moont de Schorsch, gons schlimm iss dess. Was moonnden ihr, duts bei uns hier aach Terrorisde gewwe, die su ebbes aach bei uns in Deitschlond mache deede?

Warum donn nitt?, habb isch gesaad, die duts aach bei uns gewwe unn die kenne dess iwverall mache. Unn die werns aach mache, uffem gruße Bohnhof odder uffem Fluuchhafe odder innem Fluuchzeuch odder innere Kerrsch.

Ach Gott, moont de Karl, mir hawwe doch all gedenkt, dass mir in unserm Alder sich koo Gedonke mieh ze mache brauche, unn jetz? Ess sinn joo nitt mir, mir kriehn unser paar Johr noch erum, awwer unser Kinner unn Enkel, die ihr Lewe noch vor sich hawwe unn aach beruflich vill uff Reise sinn, um die muss merr die Ängst aushalle.

Wissderr, habb isch gesaad, su zwische de John, doo hott merr joo Zeit zum Noochdenke, unn grad ferr dissjohr, wo merr Achdsisch wern, hadd isch merr vorgenumme, mir allsfort vor Aache ze halle, wie schee die Welt iss. Unn doodeferr wollt isch jeden Daach genieße unn besonnens dess Friejhohr unn all die onnern Jahreszeide, wollt merr noch e bissi ebbes oogugge unn doodeferr ab unn zu mol unnerweeschs soi, hier bei uns in de Näh unn villeischd aach e bissi weider, su long isch noch meddem Audo fahrn kann. Awwer bei dene Aussischde konnsde nor saache: Adschee, schee Welt!

Dess Fortfahrn konnsde doch immer noch mache, moont de Schorsch, ess werdd joo nitt jeden Daach unn iwverall ebbes bassiern. Awwer du host schunn Recht, wenn merr jeden Owend die Noochrischde sehe dut, doo kann merr die schee Welt grad vergesse. Seet de Karl: Dess moon isch aach. Was issen doo noch schee, wenn iwverall uff de Welt geschosse unn gekämpft werdd, weil jeder nitt nor moont er hädd Recht, naa, weiler aach e Maschinepistol unn die Munition deferr hott, um die onnern, die nitt su denke wie er, umbringe ze kenne. Naa, schee iss die Welt schunn long nimmi.

De Schorsch druff: Isch bin nor fruh, dass isch koon Fassenachder bin, isch wisst nitt, was isch dissjohr vordraache soll, wenn ...

Doo hodden de Karl unnerbroche: Schorsch, was iwverhaupt nitt bassiern derrf iss dess, dass merr uns nor noch mett dem beschäftige dun, was beese Mensche mache. Mir misse nitt immer su due als deet in de Welt alles in Ordnung soi, awwer merr derrfe uns uff koon Fall vunn Fanatiker vorschreiwelosse, was merr denke unn redde, odder?

Ja, saach isch, awwer dess iss leicht gesaad. Merr hott joo gelese, dass aach su Komiker im Fernseh owachtbasse misse wasse saache, weil ess dut immer Leit gewwe, die sich nitt nor driwwer uffreesche, naa, die aach dene uffs Maul haache wolle. Wennse nitt mieh unn donn mit Waffe oorischde wolle.

Seet de Schorsch: Hoffentlich kann merr die Mörder schnabbe, bevor die dess nächsde Mol su enn Ooschlaach wie in Paris mache wolle. Die misse doch ferr su ebbes telefoniern unn sisch dess ausmache.

Ja, saach isch, su isses. Unn noochdem vorsjohr su vill iwver die Amis unn dere ihrn Geheimdienst geschennd worrn iss, wern merr bald fruh soi, dass merr die hawwe. Eiern Honnes